

**Ufficio Stampa della Provincia autonoma di Trento**

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

**COMUNICATO n. 44 del 10/01/2022**

**Traduzione in ladino**

## **Troé fora i trei Distrec sanitères per l Trentin**

**Trei distrec sanitères per l Trentin.** Coscita l'à stabili la Jonta provinzièla, aldò de la indicazions de l'assessora a la sanità, politiches sozièles, empedimenc e familia, Stefania Segnana: “Troèr fora i Distrec sanitères l era pervedù canche l é stat endrezà da nef l'Apss che la é stata aproèda da chest esecutif via per l istà. L obietif l é chel de arvejinèr i servijes del teritorie e del ospedèl ai sentadins, col garantir l dret azes e la cures che serf, ge arsegurèr na assistenza a do a do ai pazienc, en coleament co na rei ospedaliera slarièda fora – l'à despiegà l'assessora Segnana -. Te chest contest, l Distret l à na pèrt de coordenament soraldut per chel che vèrda l lurier integrà e la promozion de na colaborazion anter desvaliva profescions, che tol ite ence i profescionis de la medejina convenzionèda. I trei Distrec sanitères i é spartì aldò de n balanzament che fèsc referiment a la popolazion che stèsc sul teritorie, doi distrec i se caraterisea per sia maor vocazion turistica, chel Sud e chel Est, enveze l distret Nord l se arvejina de più a la realtà urbana”.

**La proponeta l'à abù l parer a favor da pèrt del Consei de la autonomies locales ai 2 de dezember.**

I trei Distrec sanitères i é stac endrezé a chesta vida: Nord (Comunità Val de Non, Val de Sole, Rotaliana Koenigsberg, Paganella, Valle dei Laghi e Teritorie Val d'Adige); Sud (Comunità Giudicarie, Alto Garda e Ledro, Vallagarina e Magnifica Comunità degli Altipiani Cimbri); Est (Comunità Alta Valsugana e Bernstol, Valsugana e Tesino, Primier, Comun general de Fascia, Fiem e Val de Cembra).

Donca, i Distrec sanitères i cognarà favorir, tras n fort coordenament, n dret e pervalif azes ai servijes e a la cures sul tegnir provinzièl. Dantaldut ge vel se cruzièr di besegnes, semper più grieves, di pazienc, soraldut chi cronics, che à besegn de assistenza a do a do anter ospedèl e teritorie. Ti Distrec vegnarà endrezà rees profescionèles locales, per portèr inant na colaborazion integrèda dal pont de veduda profescionèl e organisatif per meter a jir i prozesc assistenzièi acioche i servije i abie maor percacenza.

Alò dai Distrec sanitères vegnarà logà la direzion di partimenc teritorièi e di partimenc de cordanza anter ospedèl e teritorie, aldò de n model de “teritorie polizentrich”, enveze alò dal ospedèl de la rei aziendèla vegnarà logà la direzion di partimenc di ospedèi, aldò de n model de “ospedèl polizentrich”.

**Traduzion di Servijes Linguistics e Culturèi del Comun general de Fascia**

(Traduzione a cura dei Servizi Linguistici e culturali del Comun general de Fascia)

(cdt)